

սեն թէ մեր Տիրոջ Գերեզմանը ժայռին մէջ փորուած տուն մ'էր, մարդաչափ մը բարձր այնպէս որ եթէ մարդ իր ձեռքը բարձրացնէր՝ վերի կողմը կրնար շօշափել. դուռը կը բացուէր հարաւային արեւելք, եւ դրան դիմացը կար մեծ վէմը. հիւսիսային կողմը նոյն վիճակով տան մէջ էր մեր Տիրոջ Գերեզմանը, որուն երկայնութիւնն էր եօթը ոտք, և ներքին խորութիւնը մինչև վեր երեք թիւ, Գերեզմանին և թաղուած տեղին գոյնը խառն էր, այսինքն կարմիր եւ սպիտակ» (Բար. էջ 382-83):

Ստորև կը նշանակենք Քրիստոսի Ս. Գերեզմանին աւանդութիւնները.

1. Քրիստոսի Ս. Գերեզմանը Յովսէփ Արիմաթացիէն առաջ, ըստ Եպիփանու Կիպրացւոյն (Գ. դար). — Յետո՛ւ՝ որդի Նաւեայ՝ Մովսէսէն օրհնութիւն ընդունելով Աստուծո՛ւմէ զօրացաւ առաջնորդելու համար ժողովուրդը, անուանակից ըլլալով Յիսուսի. ցամքեցուց Յորդանանը, իբր այն թէ ըսուած է. «զի՞ է քեզ ծով, զո՞ տեսեր և փախեար, և կամ դու Յորդանան զի՞ դարձար անդրէն յետս երկու բաժանելով, ճանապարհ լինել անցից Իսրայելի», և Աւետեաց երկիրը ժառանգեցուց, վեց տարի արեամբ չափ պատերազմելով, և քսան տարի ալ առանց պատերազմի հոն մնացած է. իր իմաստութեան համաձայն, զալով փրկութեան այն տեղն՝ որ աշխարհի մէջտեղն է, հրամայեց շինել իր վիճակով գերեզմանը, իսկ երբ ան վախճանեցաւ՝ թաղեցին զանիկա ի Թամնասափար(\*),

(\*) Յես. ԺԹ. 50. ԻԳ. 31, ԻԱ. 42. Իսկ Պատ. Բ. 9. կը յիշուի Թամնասարէս անուամբ: